



**Bosna i Hercegovina  
Federacija Bosne i Hercegovine  
Kantonalno tužilaštvo  
Zeničko-dobojskog kantona**

Broj: 06-04-8-1-R2/24  
Zenica, 20.05.2024. godine

Na osnovu člana 100. stav 3. i stav 4. Zakona o javnim nabavkama („Službeni glasnik BiH“ broj 39/14 i 59/22) Glavni tužitelj Kantonalnog tužilaštva/tužiteljstva Zeničko-dobojskog kantona donosi

**Rješenje  
o poništenju Odluke o poništenju postupka javne nabavke**

Uvažava se žalba ponuđača „R&S“ d.o.o. Igmanska b.b., Vogošća dostavljena ugovornom organu dana 16.05.2024. godine, poništava se Odluka o poništenju postupka javne nabavke ugovornog organa broj 06-04-8-1-R2/24 od 13.05.2024. godine i predmet javne nabavke se vraća Komisiji za javne nabavke na ponovni pregled i ocjenu ponuda.

**O b r a z l o ž e n j e**

Na osnovu Odluke Glavnog tužitelja Kantonalnog tužiteljstva Zeničko-dobojskog kantona broj 06/04-11-8-2-R2/24 od 22.03.2024. godine pokrenut je postupak javne nabavke robe - kancelarijskih potrepština putem konkurentskog zahtjeva i portala javne nabavke. Procijenjena vrijednost javne nabavke (bez PDV-a) iznosila je 15.000,00 KM, a kao kriterij za dodjelu ugovora izabranom ponuđaču predviđen je kriterij najniže cijene. Obavještenje o tenderskoj dokumentaciji objavljeno je na portalu javnih nabavki dana 25.03.2024. godine u 14:36 sati pod brojem 5486-7-1-5-3-4/24.

Komisija za provođenje postupka javne nabavke roba, usluga i radova imenovana Rješenjem broj 06/04-11-8-2/24 od 19.01.2024. godine, nakon pregleda i ocjene blagovremeno zaprimljenih ponuda, sačinila je zapisnik o otvaranju ponuda, zapisnik o pregledu i ocjeni ponuda kao i izvještaj o radu komisije u kojima je utvrdila da ponuda ponuđača „R&S“ d.o.o. Igmanska b.b., Vogošća sa ponuđenom cijenom od 14.985,69 KM bez PDV-a, odnosno 17.533,26 KM sa PDV-om nije u skladu sa tenderskom dokumentacijom ugovornog organa, obzirom da ne sadrži Aneks 1- Obavještenje o javnoj nabavci, te je kao takva, shodno odredbi člana 2. stav 2. tačka l) podtačka 3) Zakona o javnim nabavkama BiH, ocijenjena nepravilnom, dok je ponuda ponuđača „AERO EXCLUSIVE“ d.o.o., Kolodvorska 12, Sarajevo od 19.892,00 KM bez PDV-a, odnosno 23.273,64 sa PDV-om, obzirom da je znatno veća od osiguranih sredstava predviđenih za predmetnu nabavku ocijenjena neprihvatljivom. Slijedom navedenog, ugovorni organ je primjenom odredbe člana 69. stav 2. tačka d) Zakona o javnim nabavkama BiH donio Odluku o poništenju postupka javne nabavke, obzirom da nijedna od primljenih ponuda nije bila prihvatljiva.

Na navedenu odluku ugovornog organa dana 16.05.2024. godine uložena je žalba ponuđača „R&S“ d.o.o. Igmanska b.b., Vogošća (dostavljena elektronskim putem a potom i na adresu ugovornog organa dana 17.05.2024. godine) u kojoj se navodi da je ugovorni organ nezakonito ocijenio i odbacio njihovu ponudu kao neprihvatljivu, iako je ponuda žalitelja prihvatljiva i da je jedini razlog takvog postupanja što žalitelj u ponudi nije dostavio obavještenje o nabavci, pri tome citirajući određene odredbe Zakona o javnim nabavkama BiH. Prema daljim navodima žalitelja obavještenje o nabavci je sastavni dio tenderske dokumentacije a ne sastavni dio ponude ponuđača, nijedna zakonska odredba ne predviđa i ne obavezuje ponuđača da u ponudi dostavlja isto, radi se o javno dostupnom dijelu tenderske dokumentacije i dostava ovog dokumenta nema nikakvog smisla i svrhe obzirom da se ne tiče kvalifikacije ponuđača, ponuđenih tehničkih specifikacija niti bilo čega drugog što ponuđač treba dokazati u postupku javne nabavke. U prilog prednjim tvrdnjama žalitelj dostavlja odnosno citira stavove Ureda za

razmatranje žalbi vezano za (ne)dostavljanje obavještenja o nabavci u ponudi ponuđača zauzete u rješenjima ovog organa broj JN2-01-07-1-2-6/17 od 26.01.2017. godine, broj JN2-03-07-1-2575-9/19 od 21.11.2019. godine, broj JN2-03-07-1-2307-8/22 od 08.09.2022. godine, broj JN2-03-07-1-357-10/23 od 09.03.2023. godine kao i stav Suda BiH iznesen u presudi broj S1 3 U 033496 19 U od 03.03.2021. godine i presudi broj S1 3 U 035429 20 U od 21.10.2021. godine a vezano za (ne)prihvatljivost ponuda.

Ugovorni organ je, u skladu sa odredbom člana 100. stav 3. Zakona o javnim nabavkama BiH, utvrdio da je žalba ponuđača „R&S“ d.o.o. Igmanska b.b., Vogošća izjavljena protiv Odluke o poništenju postupka javne nabavke broj 06-04-8-1-R2/24 od 13.05.2024. godine blagovremena, dopuštena i izjavljena od ovlaštenog lica a nakon razmatranja žalbe utvrdio da je ista osnovana iz sljedećih razloga.

Ispitujući navode žalitelja ugovorni organ je izvršio uvid i razmotrio stavove Ureda za razmatranje žalbi zauzete u predmetima, kao i presudama Suda BiH, brojevi gornji, vezano za (ne)prihvatljivost ponuda ponuđača u slučaju nedostavljanja Aneksa 1- Obavještenja o javnoj nabavci u sklopu ponude ponuđača, slijedom čega je ocijenio da iz ponude ponuđača „R&S“ d.o.o. Igmanska b.b., Vogošća proizilazi da ovaj ponuđač ispunjava postavljene uslove i da se prema iskazanom mišljenju Ureda za razmatranje žalbi (broj JN2-03-07-1-357-10/23 od 09.03.2023. godine) radi o propustu koji se ne udaljava od bitnih karakteristika, uslova i drugih zahtjeva utvrđenih tenderskom dokumentacijom ugovornog organa. Kako učinjeni propust žalitelja ne utiče na sadržaj njegove ponude odnosno ne predstavlja bitan propust i kao takav ne može biti razlog za ocjenu ponude kao nepravilne odnosno neprihvatljive, to je i navod žalitelja u tom pogledu ugovorni organ cijenio osnovanim. Ovo posebno cijeneći stav Suda BiH izražen u presudi broj S1 3 U 035429 20 U od 21.10.2021. godine u kojoj se između ostalog navodi da „propisana forma u postupku javne nabavke nije sama sebi cilj, nego je opredjeljena zahtjevom da se obezbijedi pravična konkurencija svih zainteresovanih ponuđača. U suprotnom ako bi propusti koji ne utiču na suštinu i sadržaj ponude imali prioritet, onda bi se izgubila svrha i cilj javne nabavke u cjelosti..“.

Obzirom da je žalba ponuđača „R&S“ d.o.o. Igmanska b.b., Vogošća iz naprijed navedenih razloga ocijenjena osnovanom, to je ugovorni organ, shodno odredbi člana 100. stav 3. Zakona o javnim nabavkama BiH odlučio kao u dispozitivu ovog Rješenja, te iz naprijed navedenih razloga poništio raniju Odluku o poništenju postupka javne nabavke kancelarijskog materijala i inventara broj 06-04-8-1-R2/24 od 13.05.2024. godine.

**Pouka o pravnom lijeku:** Protiv ovog rješenja ugovornog organa može se izjaviti žalba KRŽ-u, putem ugovornog organa, u roku od 10 (deset) dana od dana prijema rješenja.

Dostavljeno:  
2x ponuđači  
1x a/a

